

ՈՒԽՏԱԳՆԱՅՈՒԹՅՈՒՆ Ս. ՀՈՎՀԱՆ ՕԶՆԵՅՈՒ ՇԻՐԻՄԻՆ

Գուգարաց թեմում ամեն տարի ապրիլի 17-ին հանդիսավորությամբ նշվում է Ս. Հովհան Օձնեցի Հայրապետի ուխտի օրը:

Այս տարի ևս Գուգարաց թեմի առաջնորդ Ս. Սեպուհ եպս. Չուլջանի օրհնությամբ և առաջնորդությամբ հարյուրավոր ուխտավորներ Օձունում մասնակցեցին Սրբի հիշատակմանը նվիրված Պատարագին և ապա այցելեցին Արդվիում գտնվող Սուրբ Հայրապետի շիրիմին:

Վանաձորից, Սպիտակից, Ալավերդուց, Մարգահովտից մոտ 300 ուխտավորներ իրենց հոգևոր հայրերի առաջնորդությամբ առաջինը հանգրվանեցին Օձունի Ս. Աստվածածին եկեղեցում, ուր հաղորդությամբ մասնակից դարձան Սուրբ և Անմահ Պատարագին: Արարողության ավարտին կատարվեց ՎՊՄԻ-ի 20 ուսանողների մկրտությունը՝ կնքահայրությամբ ՎՊՄԻ-ի ռեկտոր, Վանաձորի Ս. Գրիգոր Նարեկացի եկեղեցու խաչքավոր Գ. Խաչատրյանի: Ծիսական արարողությանը հաջորդեց ժողովրդական տոնախմբությունը. օձունցիները երգ ու պարով, գյուղապետ Մ. Այվազյանի կողմից տրված մատաղով նշանավորեցին տոնական այս օրը: Օձունի դպրոցի սաների պատրաստած զատկական հանդիսությունը, երաժշտական համարները տոնական տրամադրություն և ցնծություն պարգևեցին ներկաներին:

Օձունից ուխտավորները մեկնեցին Արդվի, ուր ամփոփված է Ս. Հովհան Օձնեցու աճյունը: Սրբազան Հոր գլխավորությամբ և հոգևոր հայրերի մասնակցությամբ Սրբի շիրիմին կատարվեց մաղթանքի արարողություն, և ապա ուխտավորները հայցեցին Սրբի բարեխոսությունը:

Թեմակալ առաջնորդ Սրբազան Հայրը, իր հայրական օրհնությունը և բարեմաղթանքները հղելով բոլոր ուխտավորներին, ևս մեկ անգամ կարևորեց ուխտագնացությունը՝ որպես երիտասարդության հոգևոր դաստիարակության և բարոյական կերպարի կերտման լավագույն միջոց:

Ուխտդ ի կատար, սիրելի՛ ուխտավոր:

ԱՍՏՂԻԿ ԱՄՐՅԱՆ